

安徽財經大學文藝學院經學研究所叢刊

孫

詒

讓

集



鳳凰出版社

安徽財經大學文藝學院經學研究所叢刊

孫詒讓集



鳳凰出版社

第六册

周禮正義

八十六卷

卷四十至卷四十七

民國二十年

.....

卷四十至卷四十七

周禮正義

八十六卷

民國二十年

周禮正義卷四十

瑞安孫詒讓學

司服掌王之吉凶衣服辨其名物與其用事用事祭祀視朝甸
凶弔之事衣服各有所用疏掌王之吉凶衣服者此皆王執大
禮臨大事之服自六冕至冠弁服爲吉服吉禮吉事服之服弁
服至素服爲凶服凶禮凶事服之凡服尊卑之次繫於冠冕服
爲上弁服次之冠服爲下王之燕衣服別藏於王府此官當之
兼掌其法與彼爲官聯也故月令云仲秋乃命司服具飭衣裳
文繡有恆制有小大度有長短衣服有量必循其故冠帶有常
彼注亦兼祭服朝燕服爲釋是也云辨其名物者卽辨冕弁冠
諸服之名與物色也注云用事祭祀視朝甸凶弔之事衣服

各有所用者並據下文不數兵事者文不具王之吉服祀昊天上帝則服大裘而冕祀五帝亦如之享先王則衮冕享先公饗射則鷩冕祀四望山川則毳冕祭社稷五祀則希冕祭羣小祀則玄冕六服同冕者首飾尊也先公謂后稷之後大王之前不密至諸盞饗射饗食賓客與諸侯射也羣小祀林澤墳衍四方百物之屬鄭司農云大裘羔裘也衮卷龍衣也鷩禕衣也毳屬衣也玄謂書曰予欲觀古人之象日月星辰山龍華蟲作繡宗彝藻火粉米黼黻希繡此古天子冕服十二章舜欲觀焉華蟲五色之蟲繡人職曰鳥獸蛇雜四時五色以章之謂是也希讀爲緇或作菊字之誤也王者相變至周而以日月星辰畫於旌旗所謂三辰旂旗昭其明也而冕服九章登龍於山登火於宗

彝尊其神明也九章初一日龍次二日山次三日華蟲次四日
火次五日宗彝皆畫以爲纁次六日藻次七日粉米次八日黼
次九日黻皆希以爲纁則袞之衣五章裳四章凡九也鷩畫以
雉謂華蟲也其衣三章裳四章凡七也毳畫虎雖謂宗彝也其
衣三章裳二章凡五也希刺粉米無畫也其衣一章裳二章凡
三也玄者衣無文裳刺黻而已是以謂玄焉凡冕服皆玄衣纁
裳疏王之吉服者以下辨王及諸侯卿大夫士吉凶諸服之
差卽此官之官法也鄉師注云吉服者祭服也此王之吉服統
冕服六弁服三而言兼有饗射及戎服朝服等蓋與服弁弁經
等吉凶相對爲文不純爲祭服也初學記帝王部引口子云君
天下者黻衣九種卽謂六冕三弁之服弁服無黻尸子蓋冢冕

服通言之玉海車服引三禮義宗云王吉服有九一曰大裘而冕二曰衮冕三鷩四毳五希六玄六者祭祀之服也皮弁素積玄衣素裳緇衣玄端此又三服所謂吉服也玄衣朱裳燕樂之服非廟祭之服故不入九服之數韋弁戎服亦不入吉服之例案崔說王吉服有九似亦本此經然於下文三弁去其韋弁不數而別舉玄端以充其數至玄衣朱裳卽鄭說天子玄端之服而崔云燕服不入九服之數皆與此經不合或展轉援引文有譌易與云祀昊天上帝則服大裘而冕祀五帝亦如之者依鄭義王祀天玄冕無旒玄衣纁裳無章朱市赤舄冬則黑羔大裘王冕服之最尊者也今案裘冕當十二旒衣裳十二章詳後疏宋縣初云大裘爲冬至祀天之服其時必裘故特言之若他祭

則有春秋四時故變文言衮服儻值冬月裘可知也禮不表裘大裘不裼則大裘之上被以龍裘可知經於祀天不言衮享先王不言裘互相備也祀五帝亦如之承上文言與祀昊天同服儻值夏月則衮冕而已案宋說是也經昊天指冬至圓丘上帝指夏至南郊及大旅言之上帝卽受命帝也五帝當指冬祀黑帝春祀蒼帝蒼帝雖卽爲受命帝然迎氣五郊禮秩平等與南郊大祀異也月令孟冬天子始裘夏秋及中央所祀三帝皆非服裘之時則亦唯被龍裘而已經云五帝禋舉之辭耳昊天上帝及五帝詳大宰大宗伯大司樂疏其祭地之服此經無文以天地同禮推之蓋亦當服衮冕十二章賈司裘疏依王肅崔靈恩說謂崑崙神州亦服大裘則非其時服不足據也又此經唯

見大裘自裘冕以下裘並無文玉藻孔疏云劉氏云凡六冕之裘皆黑羔裘也故司服云祭昊天大裘而冕以下冕皆不云裘是皆用羔裘也劉氏以六冕皆用大裘按鄭志大裘之上有玄衣則與玄冕無異是以小祭與昊天服同此則劉氏之說非也案孔所引卽劉焯劉炫說亦見詩召南羔羊疏依鄭玉藻注說王裘冕以下五冕當服狐青裘二劉說與鄭不合孔氏庶之是也互詳後及司裘疏云享先王則裘冕享先公饗射則鷩冕者裘冕服亦玄裘衣而九章鷩冕服玄鷩衣七章冕旒裳市舄與裘冕同冬則狐青裘戴震云王大祭服裘冕中祭服鷩冕享先公亦大祭而鷩冕何也土虞禮記曰尸服卒者之上服天子廟享尸服有裘冕鷩冕之殊則天子不敢一服裘冕案戴說

是也周先王先公自文王以上至后稷皆在夏商之世尸上服當以夏收殷畀今周既易以冕服故享先王服九章之衮冕降於祀天之服享先公又降之則服鷩冕也王大朝觀會同亦服衮冕經不言者文略詳後疏云祀四望山川則毳冕者玄毳衣五章以下冕旒裳市舄裘並與鷩冕同云祭社稷五祀則希冕者釋文云希本又作絺案作絺非也詳後疏玄希衣三章爲希冕服酒正注以此王服大裘衮冕祭者爲大祭服鷩冕毳冕祭者爲中祭服絺冕玄冕祭者爲小祭禮器注亦據此定祭祀獻數降殺之差謂祭羣小祀一獻祭社稷五祀三獻祭四望山川五獻祭先公七獻孔疏謂鄭據此職五冕章數釋彼獻數又云案此社稷三獻卑於四望山川而大宗伯職云以血祭祭社稷

五嶽又大司樂祭社稷奏大蔟祀四望奏姑洗又禮緯云社稷牛角握五岳四瀆角尺以此言之則社稷尊於四望山川而獻與衣服卑者熊氏云獻與衣服從神之尊卑其餘處尊者以其有功與地同類故進之在上從國中之神莫貴於社稷之類直以功見尊其實卑也以是地別神故不爲尊也金鶚駁鄭禮器注云社稷之尊非四望所可等也大司樂云奏大蔟歌應鍾舞咸池以祭地亦奏姑洗歌南呂舞大磬以祀四望此地亦實該社稷在內大蔟先姑洗咸池先大磬可知社稷尊於四望曲禮云天子祭天地祭社稷祭四方此四方當有四望是社稷次亞於天地豈四望所得駕出其上乎小宗伯大師與祭軍社使有司將事於四望四望卑於社稷可知大宗伯云以血祭祭社稷

五祀五嶽五嶽卽四望是四望次於五祀五祀又次於社稷社
稷尊於四望甚明周官一經皆社稷尊於四望而司服獨不然
何其自相矛盾乎夫天子大社粵九州地而王社祭畿內地而
是亦祭地也故北郊亦通謂之社中庸言郊社之禮所以祀上
帝仲尼燕居曾子問皆言郊社而郊特牲明言社所以神地之
道社通於地明矣九州地而最爲廣大彼五嶽能與之爭乎案
金說甚辯此職冕屨之差社稷在四望山川下與大宗伯大
司樂諸職文不同熊安生以爲社稷神實卑而以功進之與地
類酒正賈疏又以王人在諸侯之上爲比皆不足以申經義惠
士奇云司服毳冕祀山川希冕祭社稷此社在山川下者王社
也大宗伯血祭祭社稷沈祭山川此社在山川上者大社也

黃以周云社稷五祀均有大小大宗伯以血祭祭社稷五祀文列五嶽之上卽詩所稱之豕土周書作雒禮記郊特牲所稱之大社是也其五祀左傳所謂句芒祝融蓐收玄冥后土之神祭宜五獻司服以希冕祭社稷五祀禮次四望山川之下如王社州社及社稷之在都邑者是也其五祀則月令祭法所謂戶竈中霤門行之神祭宜三獻案惠黃說於此及大宗伯兩經似皆得通晉書禮志傅咸表謂祭法七祀亦此羣小祀之屬黃說與彼略同但王社亞於大社王宥有親祠而七祀五祀則禮甚輕王未必親與其事於此經究未甚合疑事無質宜從蓋闕也云祭羣小祀則玄冕者玄衣纁裳一章也據玉藻祭義王聽朔耕藉皆服玄冕經不言者亦文略也 注云六服同冕者首飾尊也

者弁師所謂皆玄冕是也賈疏云六服服雖不同首同用冕以首爲一身之尊故少變同用冕耳下經五服同名弁亦首飾尊鄭不言者義可知也冕名雖同其旒數則亦有異但冕名同耳唐郊祀錄引三禮義宗云凡六冕之服皆玄上纁下冕旒大同無以爲別故不得用冕名服取畫章之義異以立名故用服名冕也云先公謂后稷之後大王之前不窋至諸翬者賈疏云但后稷雖是公不謚爲王要是周之始祖感神靈而生文武之功因之而就故特尊之與先王同是以鄭不數后稷不窋后稷子諸翬大王父二者之間並爲先公矣周本紀云后稷卒子不窋立不窋卒子鞠立鞠卒子公劉立卒子慶節立卒子皇僕立卒子差弗立卒子毀榆立卒子公非立卒子高圉立卒子亞圉立